

# Pattison

## I.

Assaz m?es belh  
que de novelh  
fassa parer  
de mon saber  
tot plan als prims sobresabens  
que van comdan  
qu?ab sen d?enfan  
dic e fatz mos captenemens;  
e sec mon cor  
e-n mostri for  
tot aisso don ilh m?es cossens.

## II.

Qui qu?en favelh,  
lo m?es pro belh  
de mon saber:  
qu?en sai mielhs ver  
(sitot no suy mout conoyssens)  
que-l trop parlan  
que van comdan  
?Folhs es. ? Non es. ? Si es sos sens.?  
Qu?ar tost salh for  
ab belh demor  
gen motz leugiers, cortes, valens.

## III.

Ab sen novelh  
dic e favelh  
mon saber ver  
e-l fas parer  
lay on tanh que sia parvens;  
que son enfan  
li mielhs parlan  
vas me; e sai qui·m n?es guirens,  
ab que·m demor  
gen dins mon cor  
si que-l dir no·m passa las dens.

## IV.

Don d?amar dic:  
qu?am si ses tric

lieys qu'amar deg,  
que-l miels adreg  
(s'eront sert cum l'am finamens)  
m'irion sai  
preguar hueymai  
que-ls essenhes cum aprendens  
de ben amar;  
e neus preguar  
m'en venrion dompnas cinc cens.

V.  
Ben ai cor ric  
plus qu'ieu non dic  
e tan adreg  
que dux ni reg  
no prez, si no-m prez' eissamens;  
a cuy no-m play,  
ieu suy de say;  
et amarai mos bevolens.  
No vuelh preguar,  
que miels m'er car  
q'om mi prec, qu'ieu prec manhtas gens.

VI.  
L'enojos tric,  
sian del ric  
sobeiran reg  
maudig, e deg  
dels janglos parliers maldizens!  
Gic m'en hueymai,  
que-l dir no-m plai  
tan m'es lur mentaure cozens!  
Que s'il tug car  
meron, amar  
no-ls poiria, que-l cor m'en vens.

VII.  
Pauc sap d'amar  
qui tem preguar  
Deu, qu'el maldia los manens.

VIII.  
E-t voill pregar,  
vers, ab diz car  
que lai en Urgel te prezens,

IX.  
Ab talen car  
si-m fai amar.  
E-l bon esper qu'eu n'ai guirens!

- letto 321 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/pattison-14>